



SIARAN MEDIA KEMENTERIAN PERTANIAN DAN KETERJAMINAN MAKANAN

KPKM PERKUKUH DAYA SAING INDUSTRI NANAS DAN HERBA MENERUSI PENUBUHAN PERSATUAN SERTA INOVASI BIDANG PENYELIDIKAN

SERDANG, 3 SEPTEMBER 2026 – Kementerian Pertanian dan Keterjaminan Makanan (KPKM) hari ini merasmikan Pertubuhan Pengusaha Nanas SG1 Malaysia dan melancarkan Buku *A Dictionary of the Economic Products of the Malay Peninsula in Two Volumes*, karya I.H. Burkill. Majlis berlangsung di Laman Agro Food Pineapple, MAEPS, Serdang, Selangor dan disempurnakan oleh Menteri Pertanian dan Keterjaminan Makanan, YB Datuk Seri Haji Mohamad bin Sabu.

Penubuhan Pertubuhan Pengusaha Nanas SG1 Malaysia merupakan langkah strategik untuk memperkukuh industri nanas negara melalui penyatuan pengusaha dan penggemblengan usaha secara lebih tersusun. Pertubuhan ini akan menjadi platform yang menghubungkan pengusaha dengan Lembaga Perindustrian Nanas Malaysia (LPNM), agensi kerajaan, institusi penyelidikan, pemain industri, pelabur dan pasaran, dengan tumpuan membangunkan industri SG1 daripada **ladang hingga pasaran eksport** serta memastikan hasil pengusaha mempunyai **pasaran, nilai dan daya saing**.

Pertubuhan Pengusaha Nanas SG1 Malaysia menyasarkan peluasan kawasan penanaman kepada sehingga **lebih 5,000 ekar atau kira-kira 2,000 hektar dalam tempoh enam tahun**. Ianya seiring hala tuju industri nanas negara yang telah ditetapkan oleh KPKM dengan nilai eksport produk nanas disasarkan mencapai 4,000 kontena dengan nilai sebanyak RM2 bilion menjelang Januari 2028.

Sementara itu, peluncuran semula karya *A Dictionary of the Economic Products of the Malay Peninsula in Two Volumes* karya I.H. Burkill yang **asalnya diterbitkan pada 1935** menandakan usaha penting dalam memelihara dan memperkayakan khazanah ilmu berkaitan tumbuhan, haiwan dan sumber mineral yang mempunyai nilai ekonomi di Semenanjung Tanah Melayu. Edisi yang dikemas kini oleh Institut Penyelidikan dan Kemajuan Pertanian Malaysia (MARDI) ini dilaksanakan di bawah Inisiatif Projek Pemacu Pertanian: Produk Herba Bernilai Tinggi dan menjadi sumber rujukan penting

bagi penyelidikan, inovasi, pembangunan industri serta penggubalan dasar agromakanan. Seiring dengan usaha tersebut, Persatuan Industri Herba juga sedang dalam proses penubuhan sebagai platform untuk menghimpunkan pemain industri serta memperkukuh pembangunan sektor herba negara.

Kedua-dua inisiatif ini mencerminkan komitmen berterusan KPKM dalam memperkukuh sektor agromakanan negara melalui pembangunan industri yang dipacu oleh pengusaha melalui pemeraksanaan dan inovasi bidang ilmu serta penyelidikan.

Dikeluarkan oleh:

KEMENTERIAN PERTANIAN DAN KETERJAMINAN MAKANAN

